

XXI Concurso literario "CONDAU DE RIBAGORZA"

Modalidaz: POESÍA

AUTORETRATO

He iu fen parada a prous destinos
y m´han ubierto els brazos.
Quan chiros de la vida m´han arrancau del mio pueblo,
con yo ha iu contino, al mio corazón,
la ideya de tornar-ie.

Agarrada a ramas resecas
soi engardixa inquieta
y espingateo prou. Fen uso de la imachinación
m´asomo a este mon, emponzoñau
per els trastes virtuals.

Dintro l´ixambre dels humanos
mai seré la reina,
només l´abella. A yo me fa gozo ixolomar fillors,
y tamé haber de morir si fizoneo.
Ixa é la mía meta.

El que encara no he aprendiu (ni creigo que en aprenda)
a esbarrar-me del camino quan ñ´hai boira preta,
a no tastar l´aigua turbia quan m´apreta la set
y a pensar-me un muixón y volar enta la lluna.

Encetada la vida fá prou,
soi fllor d´almendrera.
Si tiengo las raices femadas y con sazón,
relluzco en la pardor del tronco
fent risetas al frio.

Emporquiada en bardos mundanos,
soi nina inocente.
Si tiengo brazos amigos on aconsolar-me,
pllena de bllancor lluminosa,
aún sé amorasiar-los.

Embafada de brisca y llamins,
feita als escamallos,
a escape fuigo de la dulzor de l´afalago.
Trio, aunque m´escuezca y puda a ixufre,
l´amargor sincera.

Las mans ben agarradas a las mans de toz els mios,
in pendientes els peus pa no chafar a nenguno,
matan la gana, pa alimenta toz los sentidos,
agún voi caminan, ubrin cielos e infiernos.

Per pllanta mare embolicada,
soi viola silvestre.
A una bafarada d´aliento amigo, fllorezco,
y a escape sirvo d´agasajo a
qui gosa acercar-se.

Con agua bendita amerada,
quan apreta el calor,
si ñ´hai pelea alrededor que busca nemistar-se,
voi remuixant la terra ixuta y
foi fllorecer l´esmo.

Per si la boira emporquia el cielo,
soi niedo acuedillor
pa penas que esvolotean, buscan on cobijar-se.
Tamé trato de arrancar punxas
pa que broten las flors.

Falcada per posguerra muda, mai seré esparvel.
Es que, mis pares, me van fer a golpes y a besos
y perfumada d´ulor a sudor y anyoranzas
vai crecer abrazada a la terra y cllaman al cielo.